

Cuntinuar cun ina politica reala

Partida burgais-democratica dal Grischun

DA GION NUTEGN STGIER / ANR

■ Sin champ chantunal vuless la pbd grischuna augmentar il dumber dals commembers. Sin nivel naziunal vul ella defender il sez da cusseglier naziunal Duri Campell. En il mais d'avrigl 2019 è previs da publitgar ils nums dals candidats e da las candidatas per quellas tschernas federalas. Preschen-tas a la radunanza da delegads da la pbd grischuna a Maiavilla èn stadas 70 persunas. En il center da la saira è stada la tscherna dal nov president e las elecziuns dals commembers e da las commembras da la direcziun da la partida. Ultra da quai èn er stadas en tavla las parolas per las votaziuns naziunales e chantunalas dals 25 da november 2018.

Betg pers il sez a l'urna

L'onn 2018 saja bain stà in onn plitost turbulent, ha ditg *Benno Niggli* en ses rapport annual sco president ad interim. Il sez pers en la regenza n'haja la pbd betg pers a l'urna, mabain pervia da l'affera da pretschs tar la branscha da construcziun bassa che saja daventada in vair politicum. Ina visada saja cur ch'il segund candidat da la partida, cusseglier guvernativ *Jon Domenic Parolini*, saja vegnì reelegì be per pauc. En quella chausa spetgia blera lavur ils proxims quatter onns, ha punctuà Niggli. Tar las elecziuns dal parlament haja la pbd pers en intginas regiuns e da l'autra vart guadagnà sez en autras regiuns. Cun 23 deputads e deputadas saja la pbd anc adina ina ferma vusch en il cussegl grond. Cun il cumbat electoral da las tschernas naziunales 2019 vegnia la pbd pir a cumenzar il pli baud l'avrigl. La finamira saja da defender il sez da cusseglier naziunal *Duri Campell*, quai che saja segir ina sfida per tuts.



Cusseglia governativa Barbara Janom Steiner daventa presidenta dal cussegl da banca da la Banca Naziunala Svizra. FOTO G. N. STGIER

In represchentant da l'italianità

Benno Niggli, il nov president da la pbd grischuna e dapi il 2010 deputà, è cuntent da pudair manar ils proxims quatter onns la partida en in futur positiv suent l'onn 2018 che saja stà in onn turbulent. Bel saja che per quel intent haja el da sia vart persunas giuvnas, engaschadas e cun cleras finamiras. Cun ils auters represchentants da la direcziun, tuts cun

ina gronda experientscha politica, duai la pbd er esser en l'avegnir ina buna partida da mez, burgaisa e che fetschia politica reala e seriusa, ha ditg Niggli. Plaschair hajan el e l'entira partida che cun il president communal da Mesauc, *Christian de Tann*, sajan las Vals talianas dal Grischun er represchentadas en la direcziun. Da la nova direcziun da la pbd fan part: Beno Niggli, Crusch (Grüsch), presi-

dent, *Aita Zanetti*, Sent, 1. vicepresidente e *Christian De Tann*, Mesauc, 2. vicepresidente, omadus da nov. *Martin Aebli*, Puntraschigna, commember e da nov *Martin Bettinaglio*, Serneus, commember ed *Ursin Widmer*, Favugn, commember. Ultra da quai appartegnan a quel gremi pervia da lur uffizis: *Jon Domenic Parolini*, Scuol, cusseglier guvernativ; *Duri Campell*, Cinous-chel, cusseglier

naziunal; *Gian Michael*, Donat, schef da fracziun.

Undrientscha per duas dunnas

Ina dunna ch'ha gi grond meritis al success da la pbd da noss chantun è l'anteriura deputada *Elisabeth Mani-Heldstab*. Dapi il 2009 è ella stada 1. vicepresidente da la partida. Cun sa retrair da la politica activa ha la dunna da Tavau er renunzià ad in'ulteriura candidatura sco 1. vicepresidente da la pbd chantunala. Ella saja stada fitg diligenta, da pled, loiala e collegiala, ha ditg Niggli en ses peds d'undrientscha per *Elisabeth Mani-Heldstab*. La pbd grischuna dastga esser loscha da la tscherna da cussegliera guvernativa *Barbara Janom Steiner* sco presidenta dal cussegl da banca da la Banca Naziunala Svizra, ha ditg Niggli. Quella elecziun en in gremi impurtant saja per la pbd bunamain sco ina tscherna d'ina segunda cussegliera federala. «Per la pbd, per nus tuts ed er per ella è quella tscherna ina gronda onur», ha accentuà Niggli.

Cunter las iniziativa

L'iniziativa dal pievel «per la dignitad dals animals da niz agriculs (iniziativa davart las vatgas cun corna)» ha la direcziun da la pbd decidì da refusar e quai cun 8:1 vuschs. L'iniziativa dal pievel «il dretg svizzer empè da derschaders esters (iniziativa per l'autodeterminaziun)» è vegnida refusada cun 61:2 vuschs. Medemamain refusada e quai cun 52:10 vuschs è vegnida la midada da la lescha federala davart la part generala dal dretg d'assicuranza sociala (LPGA) (basa legala per survegliar persunas). La dumengia, ils 25 da november 2018 vegni ultra da quai votà davart l'iniziativa chantunala dubla dal pievel per ina buna scola grischuna. Per omaduas iniziativa han ils delegads decidì unanim da refusar quellas.